



Pajaspajanem puáhtá ilo

Mij lep viättám jieččân stuárráámuu ristâlii juhle pessijáid jo kuulmâ ive maŋaluvâi spiekâsteijee tiileest. Maailm, Euroop já Suomâ tile lii suoivânistám Kristus pajaspajanem ávujuhle vistig kaskoo pandemia já talle suáđi suoivust.

Atâštâs ääigi-uv ristâlii kirho saahâ lii liijká čielgâs. Tot kulloo: Ilodid! Evangelium addel mijjân osko, ete atâštâsâst láá rääjih. Uddâ eellim Jeesus Kristusist vuáittá loopâst atâštâs.

Tai pessijái evangeliumtekstâ lohhoov Johannes evangeliumist. Nube pessijâšpeeivi tekstâpittáást muu huámmášume kiddejuvvoov Magdala Maria neelji sáánán: *"Mun lam uáinám Hiärá!"* (Joh. 20:18) Magdala Maria, ohtâ Jeesus aldemuin čuávvoim, lii Johannes evangeliumist vuossâmuš, kote tuodâšt pajaspajanem.

"Mun lam uáinám Hiärá!" Taah láá Immeel kuáhtáámist tuodâsteijee säänih. Toh muštâleh Immeel almostuumist kirkesvuodâstis. Evangeliumijn Jeesus tubdâstuvvoov eromâš vuovvijn Immeel Kandân motomijn tágárijn sullâsâš soojijn: juovlâmuštâlusâin, Jeesus kaastâst, Kirkesmittemväärist Moosesâin já Eliain sehe pajaspajanem idédist já tađe čuávvoov tábâhtusâin kida Kristus aalman lavkkim räi.

Maangâin soojijn kovvejuvvoov tot, maht ilo já mohtâ čuávuh taid vuáttámušâid. Ilo väldidij máttááttâspárnáid, kiáh lijjii čokkânâm lukkâdum uuvsâi tuáhá. Piättár lâi moovtâ huksiimin kuáđijd Kirkesmittemväärist. Engâl almottij stuorrâ iiloost paimânáid.

Ton ilon mun halijdâm povdid tuu servâđ. Immeel táttu lii, ete mij ilodiččijm. *Ilodid ain Hiärást!* avžut Reivâ filippiláid (Fil. 4:4). Nuuvt ennuv ko elimân šiettih-uv vaigâdovuodâh já kierdâm, te mist lii meid lope ilodid ilo puudâin. Kristus lii pajaspajanâm, ilodop!

Ovdláhháá pessijái 2023

Jukka Keskitalo
Oulu pispekode pispe